

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

Pisortat inissiaataannik attartortut inissiat pitsaassusaat aallaavigalugu, immikkoortorta qarfiit aningaasaqarnerannut ajorseriaataannigitsumik, attartornermut akiliuteqartalersinnaanerannut periarfissat misissoqqullugit kiisalu misissuinermi ilanngullugu attartornermut akiliutit attartortullu akiliisinnaassusaat eqqarsaatigalugit ineqarnermut tappiissutit naapertuunnersut misissoqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Kristian Jeremiassen, Siumut)

Tungavilersuut:

Pissakinnerit ullumikkumiit pitsaanerusumik periarfissinneqartariaqartut isumaqarpunga, pissakinnerit ullormiit ullormut aningaasaatiminnik naammattusaarisarput ineqarnissaq, nerisassaqarnissaq allallu pisariaqartinneqartut akissaqarfigiumallugit, taamaalillutillu pissakinnerit ineqarfinni akikinnerusunik ujarlertarput tamakkualu tassaasarput inissiat imaluunniit illut pisoqaanerusut 1960-ikkunni 1970-kkunnilu sanaat.

Inissiat illulluunniit ataasiakkaat pisoqaliartuinnarlutik akii qaffakkaluttuinnartarput isumaqarpungalu taamatut aaqqiisarneq naapertuutinnigitsaq pissutingalungu inissiat illulluunniit piunermini naammanginartumik aserfallatsaaliorneqarneq ajoramik taamaalillunilu naapertuunnani inissiat illulluunniit pisoqaanerit allaat nutaatulluunniit qaammammut akeqartarlutik.

Inissiani ineqartoqartarpoq ukiuni 20-ni 30-niluunniit allaammi sivisunerusumik ineqartoqartarluni, agguaqatingiisillungulu qaammammut 3.500 kr.-nik akiliisarunik ineqarnerminnut taava ukiumut 42.000 kr.-nik akiliisarsimassapput ineqarnermut, ukiunilu 30-ni ineqarsimanguni 1.260.000 kr.-nik akiliisimassalluni tassa inissiaq akilereersimassagaluarpa sulilu akia qaffakkiartarluni aali pisoqaliartuinnaraluarluni inissiaq pitsaajunnaaraluttuinnaraluartoq.

Pissakinnerit ineqarnerminnut naleqquttumik akiliisalertariaqartut isumaqarpunga periarfissatullu tikkuarusuppara pisortat inissiaataanni inissiat pisoqaassusaat aallaavigalugu ineqarnermut akiliuteqartoqartalerpat, pissakinnerit inissiani illuniluunniit pisoqaanerusuniittut periarfissinneqarnissaat taamaalilluni ammaanpeqassaaq ini mik attartornerminni, taamaalillutillu ulluinnarni inuuniarnermut inuussutissanut tapertaalluassalluni.

Inissiammi illullu amerlavallaqaat akisuallaartut inuiaqatigiinnilu tamanna iliuuseqarfigineqartariaqarpoq pissakinnerit atugaannik oqilisaaneq aqqutigalugu, taamaalillunilu

ineqarnermut naapertuunnerusumik akiliisoqartalissaaq, soorunami inissiat pisoqaanerit akitsoriartuinnartinneqassanngillat illuatungaatigulli akikilliarortariaqarput pisoqaliartuinnarnertik aallaavigalugu.

Naalakkersuisut misissortariaqarpaat inuiaqatigiinnut qanoq naleqassanersoq taamatut aaqquissuussinermit kingunissaalu sukumiisumik misissorneqarluarsimassallutik.

Isumaqarpunga attartornermut akiliutit attartortullu akiliisinnaassusaat eqqarsaatigalugit ineqarnermut tappiissutit naapertuunnersut misissussallugit piffissanngortoq.

Misissuereernermit politikikkut aalajangiinissaaq pisariaqarpoq, akiliutit, akiliisinnaassuseq tapiisarnerullu oqimaaqatigiissumik inissisimanissaat pingaaruteqarmat.

Taamatut siunnersuuteqarlunga Inatsisartut oqallilluarnissaanik kissaappakka.

Siunnersuutip aningaasatigut allaffissornikkullu pisortanut kinguneqaatissai

Misissuinissaaq Namminersorlutik Oqartussanut allaffissornikkut aningaasartuutaanissaa naatsorsuutigineqarpoq. Suliaqarneq AC-tut atorfillip ukiup affaa sulineranik naleqassasoq naatsorsuutigineqarpoq, aningaasanngorlugu 250.000 kr.-nik naleqassangatinneqarluni.

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai

Soqanngilaq.

Siunnersuutip inmuttaasunut allaffissornikkut aningaasatigullu kinguneqaatissai

Soqanngilaq.